

Марҳабо, мўминлар баҳори!



15:00 / 27.11.2020 4049

Эрталаб иш, ўқиш ёки бошқа бир сабаб билан йўл четида кетиб бораркансиз, кузнинг оёғингиз остига тўшаган гилами – олтин япроқларга бефарқ ўтиб кетмасангиз керак. Босиб ўтаётганингиз бандидан узилган баргларга қараб, уюлган хазонларга қараб умр ўтаётганини ўйлайсиз... Кузнинг адоғи, қишнинг аввали шу-да, дея хаёлланасиз... Бироқ озгина адашмаяпсизми? Қиш мўмин учун баҳор экани ёдингиздан кўтарилди, шекилли.

Пайғамбаримиз соллаллоҳу алайҳи васаллам нима деганларини эсланг:

«Қиш мўминнинг баҳоридир. Кундузи қисқа бўлади, (унда) рўза тутади. Туни узун бўлади, (унда) қоим бўлади».

Имом Байҳақий раҳматуллоҳи алайҳнинг «Сунани кубро» китобида келтирилган ушбу ҳадисни такрор-такрор ўқиб кўринг. Аввало, ҳадис матни кўзингизни, кўнглингизни яшнатади, қалбингизга баҳорий илиқлик олиб киради. Мазмунига руҳиятингиз боғланади. Иншааллоҳ, бу қишни кўклардек фараҳбахш ўтказишга ният қиласиз.

Бу муборак ниятингиз рўёби учун islom.uz портали сизга яқиндан ёрдам беришга шай. Келаётган қишнинг совуқ ва қоронғу тунларини ибодат, илм, зикр ва дуолар ёрдамида илиқ ва мунаввар бўлишида ёрдамчингиз бўлиш ниятида. Бу ишда Аллоҳ таолонинг Ўзи тавфиқ берсин.

Келгуси фурсатларда “Қиш мўминнинг баҳори” сарлавҳаси остида туркум мақолалар беришни ният қилдик. Зеро, кумуш фаслнинг узун тунларидаги олтин лаҳзаларни Роббимиз ёди ила ўтказиш, ўша онлардан унумли фойдаланиш, манфаат олиш ҳузурли, қолаверса, зарурийдир. Чунки Аллоҳнинг зикрисиз ўтган вақтимиз кейин афсус-надоматга сабаб бўлиб қолмасин...

Бизни масрур этувчи, мўминлар баҳори, хуш келдинг, марҳабо!

Islom.uz сайти